

2 Timoti

Timotirina Poli Pikariyikwia Ayawidaasi Yidavakesi.

1 ¹Timoti,
Polinyi pikarya da' yida'manigeinyi. Gotiyai gannya simunyavi Kiraazitiyai Jizaazare Nyidaasadeinyi yima'nya'neinyina yawiraka nyidahilakakeinyi. Nabaai Gotiyai yune naanga nebulya'na widake'na a'mwera Kiraazitiyai Jizaazari wilamwaaibiza' yune gaalyabwi wijaaya'nei Apozeliyainyi nyidahilakakeinyi. ²Yi sareinyi Timotiginyi giminyina nyivu'nadeigi nimore kaimiraayaiginyi githawasiwaabeiginyi. Gotiyai Nenimaangelyi Kiraazitiyai Jizaazai nimore Naangelyi yanga gaimwange'na gika! Kale'na gaimwange'na gika! Kwaamu'nanyabwi tewaanya gwakika!

“Su! Su!” widaka yagaala tewaanyavina simunyavi yivaimwagake'nesi.

³Gimi Kiraazitiyai Jizaazari nayaa nebulya'na limwaga'dinyavina nimi Gotiyari “Su! Su!” widadinyainyi. Sahwari nimore Ne sinnawinyara yilaaya yamaryaatabaabi' nimi kwainyi yilaaya yamaryadinyainyi. Nimore simunyai padaihirakyari yibwakimanige. Nimi Gotiyarina yivanige dazabwi nebwinu yida'maraangebwi midaaka! Nabaai nimore Naangeri yidaangadinyagaa' sawisaviji yirikegaasi yuyagaa' giminyina yawi'di Gotiyari “Su!” widadinyainyi. ⁴Nimi giminyi yagalya'mavegaa' gimire tinnyari kidalaalyai gwalaabake'na yawi'dinyavina “Nimi yilaaya yune nebwinu yima!” dadi giminyi tinna wanganya'na tewaanya nyivu'nadeinyi. ⁵Nimi ayina gyawi'manige. Gimire diraginna limwagasa' nebwinu limwaga'dinyi. Diraginna limwagata sasare sabwi aayagaa' gimire Ne jakaanga Loyiziyavi gimire gwaanga Yuniziya' kiriviji warakabaabisasi. Nabaai nimi nebwinu yawi'manige. Diraginna limwagata dazabwi gimi kwaiginyi gwarikesi.

⁶Sare'na nimi “Gimire simunya' dihaa'bwarima!” dadi yivanige. Yi Gotiyare yanga daza' sihumale' gwarike'na jawi'de'nanyi. Kigaa!

nimi gimire minyaginyavi asiraai kilagwake Gotiyari yanga daza' maaraginyaiginyi. Dahaa' gimi a'mwei dike' pwa'nyi ya'daa'nyi naanga yidakidevaaibi' Gotiyare wawinya ya'neigi ginnya yanga daza' naanga girya'ne' yawiradikaa'na ja! 7Sare' darevinyi. Gotiyai gamire Kurya Tewaanyari yanga nejaavakelyi. Kurya sai neminyi lika ya'neinaavi nemwaaiahadei mi'. Aawa. Sai diraginya mwaalya'neinaavi, nevu'nya'neinaavi, simunya nayaa pada'galayawi'daa maremwaainya'neinaavi nemwaaiahadelyi.

8Sarevidaa'nyi nemire Naangerina jalikurakya'na gimi wagila magivwa'nannera! Nabaai niminyinaji sahwarina kalavuzangevi nyirakesainyina wagila magivwa'nannera! Aawa. Gimi Gotiyare diraginya' maara'giziya'na yagaala tewaanya' wigaimwagya'neigi nimiji taanga dinye'mwannamaaka! 9Gotiyai sai mena nevadaihasamaarakei nemi tewaanyaina yima'nya'neinaavi jaka mena nejivwaramaarakelyi. Yi nemi tewaanya yagongina myawiryada jaka sara nejivwaramaarakenna mi'. Aawa. Yune gamire yawisavidaa'nyi neminyi yanga gaimwange'na neyada neminyi jaka sara nejivwaramaarakelyi. Sinnawi kigaakuna, Gotiyai Kwaakeva' mwakyaakegaa' Kiraazitiyai Jizaazarina yanga gaimwanga daza' neminyina nejaaya'neinaavi nedahilakyaakelyi.

10Dazagaa' dahilakake' kiri' dathahaasagaa' nemire nevadaihasamaa'dei Kiraazitiyai Jizaazai walaabakevi yanga daza' ku'maayaba mena yima'niwaabi'. Yi sarevina piri' daresi. Kiraazitiyai Jizaazai balya'ne diraginya' wavila'nikelyi. Yi piri' daresi. Yagaala tewaanyavi gaalyabwi kayaaka minyi ya'ne' marima'naabakelyi. Yi Kiraazitiyai Jizaazai sara yoimavakesi. 11Yagaala tewaanya dazavine wawinyavi nimi wijiwakamarya'neinyi mwaaidi Apozeliyainyi wijiwiryainyi nyidaasa'neinyi nyakakeinyi. 12Sare'na nabaai taanginya daza' a'mwera nyijaavadivisainyi. Kiri' nimi dazavina wagila nyivwa'nadeinyi mi'. Sare' darevinyi. Nimi diraginna limwaga'dinya dazarina mena yawi'dinyainyi. Nabaai yagaala tewaanya nimire asiri nyakaka dazavi sai dame yiniga wi'na daavannei midaaka! Yi nebwinna sara yawi'dinyainyi. Yi nabaai daza' yuyagaa' nayaa waribainada yune Yirika naanga yima'naabathe sagaa'na. Waribainadesi.

13Timoti, yagaala tewaanya maamidarya' nimire maangiki kadika nyu'naginya yi sa a'mweraavi avaaina wijiwaakya'ne kuna dilimwagaka! Yi gimi Kiraazitiyai Jizaazari nayaa diraginna limwadi Gotiyarinaji a'mweraavinaji givu'nada nabaai sasare sabwi yagaala sangi diraginna dilimwagaka! 14Gotiyai yagaala daza' gimire asiri gwakake' dameigi nayaa dithaaka! Nabaai Kurya Tewaanyai neminyi wilanemwaalikei wawinya dazavina yiniga wi'na gihaimwagathelyi.

15Dare' mena yawi'manigi. A'mwe limwadivita yuya Piroviji Eziya mwaalyara sahwarajiya Pizelaazalyi Emozenizalyi saraai

kwaraalyi kalavuzainyina mena nyagalya'mavesainyi. ¹⁶Kiri' pigasa Woneziporaazai nimore kuryari nyivaimwadelyi. Nabaai sai nimore kalavuzangevi mwaaidinya sa'na wagila wivwa'nadei mi'. Yi sare'na Naangei Woneziporaazariji gamire angeviyaraaviji kale'na gaimwanga wiana! A'mwe sahwei niminyina wagila wivwa'nadei mi'. ¹⁷Aawa. Sai Anga Romi davanna bi'ma'na yaka biramaasa'na yagiyagi bi'da dividaa'nyina nyibiramaarakelyi. ¹⁸Yirika naangegaa'na sahwei Naangeri kale'na gaimwange' biramaarana! Nabaai Anga Epazaazi sahwei kwalaalyanna nyidaayada nyigaimwagake daza' gimi saigi nayaa mena yawi'maniginyarinera.

2 ¹Sarevidaa'nyi, nimore kaimiraayaigi, gimi saiginyi Kiraazitiyai Jizaazai yanga gaimwanga gyakevi Gotiyai diraginya givaimwagatheiginyi. Diraginya sa' dimaaka! ²Nabaai yagaala gimi kadika wi'nadinya sa a'mwe jalikurakya'ne kwalaalyaraayaba nimi wijiwakadaari yi daza a'mwe pwara nayaa maremwaabi'deraavi nayaa jawirawijaama! Yi sahwa diraginna limwaga'divisara divi a'mwe pwaraaviji nayaa wijiwiripinerera.

³Kiraazitiyai Jizaazare aawilata tewaanyaigi kwaamu' mwaala'gizi taanginya nemi aawilata pwainaavi ma'daanyabaabi' wawinya yija dazavina taanginya dinye'mwannamaaka! ⁴Sare' daresi. Aawilata aane pwai kwai wawinya dala nabinabinya piniji limwagathe mi'. Sai "Aawilasaraavi maremwaalyari niminyi nyidahilakakeri nimore wawinya yiwijanna tewaanya wigalima!" dozi yune aawilasaraavire tewaanya sabwina limwagaradelyi. ⁵Nabaai ke'ba'nanya piri' daresi. A'mwei gavamarasi'nyiya yada dazabwina kiwinya dinike' mamidinyi yaja' yi sai gamidaasi wawilavajare' mamaari yadelyi. Aawa. Kiwinya dinike' nayaa midinajai yi sai maaradelyi. ⁶Nabaai ke'ba'nanya aaya' daresi. A'mwei wawinya yagiyagi yada wia buridehaa' maremwaalajai wawinya yaja sangi aayagaa' gamidaasi tika munne yabwaryagaa' sinnawi maarana! ⁷Nimi yagaala diwe dazavina gimi simunya' nayaa jawika! Sare' darevinyi. Naangei gimire yawisavi giwiryadelyira. Sarevi nabaai gimi yagaala yuyangiya aaya kaavilya' jawirangadeiginyira.

⁸Jizaazai Kiraazitiyarina simunya nayaa jawika! Sai balakeri yidikaavakerina, sare sai Kingiya Devitimire yisavaakidaasarina nimi yagaala tewaanya' dadinyarinera. Nayaa yawi'di diraginna kuna dithaaka! ⁹Nimi yagaala tewaanya daza' wijiwaake'na yune dazahirivina a'mwera kayaa'nanyabwi yaderina taanginya wijaavadivitabaabi' taanginya dala pininna pininnanya nyijaavadivisare. Yo, kalavuzi kiriviji wila nyirakesare. Kiri' Gotiyare yagaalya' kalavuzi yi'narade' mika! Sa' yuneba kaanya kuna yamaryadesi. ¹⁰Sarevidaa'nyi nimore simunyabwi diraginya yivaimwannadi taanginya yuya daza maa'manigeinyi. "Gotiyai yune gaminne dahilakinikeraavina gaimwagima!" dadi yivanige. Nimi

yawi'di “Kiraazitiyai Jizaazai yuna wivadaihasamaata sa' gannya gaalyabwi sahwara kwaraji maapika! Sara yipijara yuyagaa' yuyagaa'ne byaanna diraginyavi nawi'nyavi mwaabika!” yawi'di diraginna daa'manige. ¹¹Nabaai diraginna dithaaka! Sare' darevinyi. Yagaala datha' diraginna nebwinna limwaga'daanya'nanyi. Yi dara dini'

“Nemi gamiji ye'mwannabaloina mwalaaja'

Nabaai sahwalyi gaala ye'mwannamwalaadeinera.

¹² Taanginya yuya sabwi maarya'na

Nemi diraginna mwaaihoina mwalaaja'

Nabaai sahwalyi kingiya ye'mwannemwalaadeinera.

Kiri' 'Gamireina mi', daatheina mwalaaja'

Nabaai neminyina 'Nimirera mi', dathelyira.

¹³ Gaminyi diraginna kuna malimwagaryaaja'

Sahwai gannya yagaalya limwaga'dei mwaaladelyi.

Darevinyi. Gami sarine ayina yawiradannei mi'.”

Gotiyare wawinya yaderina Gotiyai “Tewaanyalyira,” dake'nesi.

¹⁴Yuyagaa' gimire a'mweraavire simunyangina yagaala dazangi yidikavimwaaihya ja! Gotiyare tinnyari yagaala dala pininna pininnanyanna mala jihurayi'nya nyipidi'de'na yagaala diraginna dizalikurakideiginyi. Sasare sabwi a'mwe aane pwai kwari yiniga wi'na gaimwagathe' mi'. A'mwera yagaala sasarengi kadika wi'nipijaraavi simunyangi yuna kayaaka yigalakina yadesi. ¹⁵“Wawinya widaayadinya nebulyainyi Gotiyarina wijaavinima!” yawi'di diraginna nayaa ja! Sara kya'gizi Gotiyai gimire wawinya yijaiginyina tewaanya wivu'nadelyi. Sarevi yagaala nebulya'na nayaa yida'nanya'na duziwaakya! Sarevidaa'nyi “Gotiyaryaba wagila mamaari yivanigeinyira. Sabwina yilaaya nyadelyira,” jawi'deiginyi.

¹⁶Yagaala waramarina yanne dala pininnanyaji madinna! Gotiyarebwi maayanna madinna! Sare' darevinyi. Yagaala sasare sa Gotiyari bule'na wijaaya'ne tuta sariki a'mwera sara dadivisaraavi kuna makwodengi.

¹⁷Sarevi nabaai kumire yagaalya wa'waaya bwia bu'de tika da'de kilaakeji' kayaaka yigaide sabisangi. Sara yada naanga yima'nadengi.

Sara kayaa'na dadivita yita savaakidaasaraai yi Aaimenaayazalyi Paailitazalyi saraalyira. ¹⁸Sahwaraai sikwa yirawakiwaai. Yagaala nebulyavi yiwetawakya yiwaalyaraalyi. Saraai kwaasi dara dadisaraalyi “Gotiyai bainikeinaavi kuryaraavi mena neyidikaa'mwakesi. Divi kilaaka mudikejisi madikaayi yaadeinera.” Yagaala sasare dazavi a'mwe pwaraavire yawita Kiraazitiyarinevi kayaaka yigaimanigilyaraalyi.

¹⁹Sare' kiri' Gotiyai simya diraginya naangeri mena widaakwakabaabi' gamire a'mweraavi wivaimwadelyi. Sara widaakwakei diraginna daavi'. Simya dazari yavikwajike'bi' pikarya' dara dinikesi. Naangei gannya

yune a'mweraavi nayaa yawirangamanikelyi. Nabaai pikarya piri' daresi. A'mwe yuya gazarazara “Naangerineinyi,” dadivisara kayaa'nanyabwi yida'maraanga mya sabwina bule'na wijaavipika!

²⁰ Anga naangevi maa'gula pini goliyaji silivaayaji wana nawi'nya yavikarinike kininnake gave daaka! Aawa. Pini yisangi yavikaryadivisaji pini kwaakengi yavikaryadivisaji warikengi. Yi pini wawinya nawi'nya ya'ne, pini wawinya waryaanya dala nabinabinya ya'ne. ²¹ Sarevidaa'nyi a'mwe pwai gami sari sasare kayaa'nanya sabwi duimwagasi'ninoji nawi'nya giri'maayai mwaalajai wawinya nawi'nya ya'nei mwaaladelyi. Nabaai sai gamire Naangeri yiniga wi'na gaimwagannelyi. Yuya wawinya tewaanya sanna yavutavemwaala yannelyi. ²² Sare'na gimi yuya kayaa'nanya yawita sabwi miginyaraavire simunyangi yima'nade diraginya sabwina likaanya jenadakwona! Sara yadi yida'maraangebulyi diraginna limwangebulyi pwaraavina givu'nyabulyi kwaamu'nanyabulyi dimijamakwona! A'mwera simunya yida'maraangebwi kininnakera Naangeri jaka widadivisaraji sabwi dimijamakwona!

²³ Yaasiwaka yagaala dala pininna pininnanya a'mwe navi'navika simunya muwarikeraji gavamarasi'nyiyagaalyangina “Aala!” dithana! Gimi mena yawi'manigi. Sasare yagaala sa' malyabwi marima'naabadesi. ²⁴ Kiri' Naangere yaasiwa'wawinyai mala tamamarya'nei mi!. Aawa. Sai a'mwe yuyaraavi bwiwanna mwaalana! Sai wijiwaakya'nei nawi'nyai mwaalana! Sinna tika daya sabwi myada a'mwera gaminyi kayaa'na wigaidaapi baihana'na wiana! ²⁵ Yi sai kwaamu'nanyabwi nayaa yada a'mwe yagaala galazekivaidivisaraavire simunyangi yavada'galana! Sai sasara yaja! Gotiyai sahwaravire simunya mudikebwi yawiramaasabwi wijaavadera dingaka? Yi sara yapiji yagaala nebulya' nayaa yawirangabi'dererera. ²⁶ Sinnawi Kayaa'nanyare naanyavi gamire yagaalya' midinya'neraavi wila yirakakere. Nabaai gimi kave wijiwaakya'ne sahwaravire yagaala nebulya' yawirangabiza' naanyavi yagalya'mapi'devaai' kumire simunyangi ayina nayaa yawipi'dere.

Yirika aaya'negaa' kayaa'nanya kwalaalyabura yima'naabathe'nesi.

3 ¹ Kiri' gimi nayaa dara jawika! Yirika aaya'nerikaavi taanginya kwalaalya kayaa'nanya yima'nadengi. ² Sare' darevinyi. Sagaa' a'mwera yune kumi saraavina wivu'nadere. Nigwianna tewaanya wivu'nadere. Yune kuminyine yayanna makidivisare. Pihadika yadivisara yaasiwa' yamarina, Gotiyarinaji biraiyagaala widina. Kuvinimaangeyuraavire yagaalya galazekivaina. “Su! Su!” mujadivisara. Yuya tewaanya nawi'nyabwi maayara. ³ Kumire avaaitaweraavina nayaa muvu'nyadera. Mayagaala jawwi makwasakipi'dera mi!. Pwaraavi kwaasi diraginna jida'divitara. Kwaamu'nanyabwi maayara simunyangi nayaa mamaremwaainyadivitara. A'mweraavi yaasiwa'

kayaaka yigalamarina. Tewaanya yuya saburina similika wimwaaidera. ⁴Kumire kwiya'mwera yikamaangeraavire asiri marimwangina. Kumire simunya yuya kayaa'nanya sabwi yime'nya'bi' midinna. Pihadikebwi yadivi' "Nemi a'mwe naangeine," yawi'na. Gotiyarina "Aala!" dadivi' muvu'nyaderera. Aawa. Wabahilaakeburina wivu'nadera. ⁵Gotiyari kwaasi yune kilaakejikina mididivi' kiri' Gotiyare saburiya diraginya sabwina bule'na wijaavadiwi'. A'mwe sasare saraavi yagalya'ma'na ja! ⁶Sare' darevinyi. A'mwe sasare saraavidaa'nya pwara "A'mwe sangi kwaasi kave wabwiwayagaala widaana!" dadivi' simunya nawi'nya myawiryadivita sangire angengi kave widivi' kumire simunya wila galyirakidivisangi. A'mwe sasare kayaa'nanya yingakinike kininnake kumire simunyavi taanginya wa'demilike. Kayaa'nanya dala pininnanyanna mwagi'namarya'na kumire simunya' dikaa'demilike. ⁷A'mwe daza yuyagaa' yagaalya maa'divita kini kiri' yagaala nebulya' yawirangadivita mika. Yi sahiningire angengi bwidivi' kayaa'na wijiwaakadivisare. ⁸Kigaa' Jaanizalyi Jaabirizalyi saraai Ne Mozizarina yikamaanga yima'nagila yelyabaaibi' a'mwe dazara kwaasi divanigasara yagaala nebulyavi yikamaange' yivaniga'. Kumire simunyabwi Saataani simunya kayaa'nanyari mena wakakera kayaa'na yawi'divisara. Sarevi sahwaravina Kiraazitiyari limwangebwi kwaasiyabwi yima'nakesi. Gotiyai sahwaravina yaamiji yidakwasanganaka gamire bule'na wijaavina. "Aala!" dina. ⁹Kiri' kumire dazabwi naanga yima'nadevwi mi'. Sare' darevinyi. Sinnawi kigaa' a'mwera Jaanizalyi Jaabirizalyi saraare navi'navikebwi tinna wanganyaatabaabi' a'mwe yuyara kumire navi'navika sabwi tinna nayaa wangabi'dere.

Gotiyare yagaalya' nayaa pada'galalimwangebwinisi.

¹⁰Kiri' gimi saigi nimiji nye'mwannayamaryadi gimi nimorebwi mena yawirangadinyaiginyi. Yi nimore wijiwiryabulyi, nimore mwaalyabulyi, nimore yuya saburi aaya kaavilyaji, Gotiyari diraginna limwagasabulyi, kwaamu'nanyabulyi, a'mweraavina wivu'nyabulyi, taanginya maa'di diraginna mwaalyabulyi. Yuya sa nyawirangadinyaiginyi. ¹¹Kayaa'nanya yuya sa a'mwera nyadaapi nabaai yuya daanga sa maa'dinyainyi Anga Aadiyokiji Anga Aaikoniyamiji Anga Lizitiraaji mena nyawiranganaginyaiginyi. Yi kayaa'nanyaji daangeji sa nyijavadaapi diraginna daa'di maa'dinyainyi. Nabaai sara kayaa'na nyadaapi Naangei taanginya yuya dazangi nyivadaihasamaarakeinyi. ¹²Yo, a'mwe yuyara Kiraazitiyai Jizaazari wilamwaaidivisa'na "Gotiyarebwi midinaana!" dapi yipijaraavi yikamaangera kayaa'na wigaibi'dere. ¹³A'mwe kayaa'nanyaraji kwaasiyaraji kumirebwi kayaa'nanya naanga yima'nadesi. A'mweraavi kwaasiyabwina kwaasi wijiwaakipi'dere. Nabaai sahwaravai kumi kwaraavi Saataani Kayaa'nanyai kwaasiyabwina

wijiwaakadelyi. ¹⁴Kiri' gimi saigi maaraginya yagaala dazasi mena limwagahinya dazasi nayaa kuna dilimwagaka! Nemi a'mwe yagaala dazavina giziwakadaanyainaavina nemire tewaanyabulyiyainaavina nayaa neyawirangadinya'na diraginna kuna dilimwagaka! ¹⁵Nabaai datha' kirisu yawirangadinyaiginyi. Sinnawi gimi kaimiraaya maalikeigi kuna mwaalagina Bukuya Tewaanyavi simunya gaai yawiramaaraginyaiginyi. Bukuya dazi simunya tewaanya' yiniga wi'na gizaavannilyi. Sara kagyozu Gotiyai givadaihasamaarya'neigi Kiraazitiyai Jizaazari limwadinneiginyi. ¹⁶Gotiyare Kuryai Bukuyaviya yagaala yuya marima'naabakelyi. Nabaai yagaala daza' neminyi simunya wijaaya'ne tewaanaangesi. Sara yada nemire kayaa'nanya yadaanya sabwina neyibwaridaakwada maanga nedade'nanyi. Nabaai nemire mwaalyaburi neyavada'gaide'nanyi. Sara neyada yida'maraangebawina neyiwiryade'nanyi. ¹⁷Sarevidaa'nyi a'mwe Gotiyareru wimwaaihada diraginya yunebanna yiniga wi'nanyari. Sare'na wawinya yuya tewaanya sa ya'na yemwaala yivanikelyira.

Gotiyare yagaalya nebawina wijiwaakyabwinesu.

4 ¹Kiraazitiyai Jizaazai a'mwe yuyaraavi, gaala mwaaihasaraaviji bainikeraaviji maryawibwaradelyi. Yi sahwalyi Gotiyalyi saraaryaba yagaala diraginna dara gizalikurakivanige. Kiraazitiyai Jizaazai a'mwe yuyaraavire tinnyari yima'naabozi Kingiya yuyagaa' yuyagaa' maremwaaaladelyi. ²Sarevidaa'nyi gimi dazahiri'na yawi'di gamire yagaalya' duziwaakya! A'mwera yagaalya' kadika wi'nya'na yilaaya yipijahaasi yilaaya mipijahaasi yuyagaa' yawiralimwagarya'neigi diraginna ja! Kumire yiwetawakya'na maanga duthana! Kumire simunyari widihaa'bwata ja! Gotiyarebwi midibi'de'na kumire simunyavi yivaimwagawimwaaihina ja! Sare'na ya'ne yuyagaa' gimi kwaamu'na yadi sahwaraavi nayaa jiwirideiginyi. ³Sare' drevinyi. Divi saga' a'mwera yagaala maamidarya mamaari yipi'dere. Aawa. Yune kumire yawita kayaa'nanya saburina mididivi' kumire wijiwiryaya ya'ne kwalaalyaraavi maramadakipi'dere. Sarevi wijiwaakyara kumire kadikikaavi sika mwagi'nadivi' yagaala pini kuminyi tewaanya wivu'najanna maapi'dere. ⁴Yi sare' piri' daresi. Yagaala nebulya' kadika wi'nya'nevina ginyira'na yipi'desi. Piri' daresi. Yagaala yaasiwaka genna wajingyagaala dala pininna kadiki' wakamaremwaabi'dere. ⁵Kiri' gimi saigi yuyagaa' yuyangi simunya nayaa pada'gaina jawika! Naangerina taanginya dimaaka! A'mweraavi yagaala tewaanya' wijiwaakya'ne wawinya nayaa ja! A'mweraavi widaaya'na, gaimwange'na wawinya' kininnake'neiginyi. Wawinya daza' gimi nayaa yunebanna pada'gala ya ja! ⁶Sare' drevinyi. A'mwera kwaraanyaba Gotiyarine waainiya dingadivitabaabi' tamakya'neinyi nimiru tawe' mena

dima'nade'nanyi. Nimiregaa' mena kibawa yiwawode'na yiwakegaaki. 7Mala nawi'nyavi Naangerina gaidaa'mweinyi. Naangerine wawinya'na gavamarasi'nyikaanya kaanyave'na mena nayaa wiweinyi. Daa' aayawinyavina mena yi'maveneinyi. Diraginna limwagasabwi mena diraginna limwamweinyi. 8Nabaai daaa' a'mwe gavamarasi'nyikaanya' wavila'divisaraavine tivikisa' yemwaala nyi' niminyina. Tivikita daza' dare'na. Yirika Naanga dazariki Naangei niminyi “Yida'maraangebwi yadinyaiginyira,” nyidathesi. Naangei sahwai yawibwata'ne yida'maraangelyi. Yi naangegaa' tivikita daza' nyijaavatelyi. Nabaai kiri' niminyina gaveinyina nyijaavadeinyi mi'. Aawa. A'mwe gaminyi ku'maayabanna kima'naabozi tinna wanganya'na mena wivu'naderaavi yuya sahwaraavi wijaavatelyi.

Polimyawinna Timoti wiya'nesi.

9Gimi yime'nya'bi' ya'gizi maalikegaa' niminyawinna yarai divadeiginyi. 10Sare' darevinyi. Dimaazai dahaasa sabwina tewaanya wivu'nade', niminyi mena nyagalya'mavaka Anga Tezalonaaikana wiwakerina. Nabaai Kirezani Piroviji Galeziyana wiwa'. Taaitazai Piroviji Dalimeziyana wiwa'. 11Lukiyai gave sahwainanyai nimiji nye'mwannamwaali'. Gimi Maakiyari maara'gizi dimakadelyira. Sare' dare'nesi. Sai nimire wawinyavi gaimwange'na tewaanya nyadelyi. Sare'na dimakadelyi. 12Nabaai Tikikaazari Anga Epazaazina mena maryaasiwa. Sarena yarai divadeiginyi. 13Gimi “Wima!” da'giziyagaa' nimire yivita yirilyagaa'ne saaminyi daza' dinyimaa'deiginyi. Yivita sa' anga Tirawaazi A'mwe Kaapazare angevi wakesi. Nabaai bukuya kiniji maara'gizi nabaai navika nyiwidi'de'na sipizipiyangire kilaakengi yavikarinikeji dinyimaa'deiginyi.

14Alekiadaai, kwaari'mata biraaziya yavikaryadei, sai niminyi wana kayaa'na nyigalakelyi. Sara nyake sari divi yiniga gami yake sabwina Naangei kayaa'nanya wirivikiradelyi. 15Nabaai gimi kwaigi a'mwe dazarina nayaa mala jiwannadeiginyi. Sare' darevinyi. Dazahwai nemire yagaalya marulawakya neyibainatelyi.

Yagaala pininnesi.

16Aaya mudi'nanyagaa' kotiyavi yagaalya widadaari nimiji nyigaidaavaka nyigaimwagakei a'mwe pwai kwai mi'. Aawa. A'mwe yuyara yagalya'makuna nyesare. Sare'na nabaai nimi Gotiyari yidaangadinyainyi “Kumire kayaa'nanya yivanigata sanna myawi'dinnera!” 17Sare' kiri' Naangei niminyi yuyagaa' nyangada gamire diraginya' nyijaavakelyi. Sarevi “Nimi yagaala tewaanya' yiniga wi'nanya' wijiwaakima! Sara wijiwakadaa'muri ajimya yuyangiyara yagaala sa' kadika wi'nipika!” dena sara wide. Nabaai Gotiyai kavijilikere

(laayoniyare) maangevi nyurakasamaarakelyi. ¹⁸ Yuya kayaa'nanya sabura niminyina “Kayaaka yaana!” dadivi' nyadaapi Naangei nayaa nyurakasamaaradelyi. Sare'na nabaai gamire maremwaaide naangevi Sigunyavina nyimakwia'neinyi nyivadaihasamaaradelyi. Sahwarina “Byaannakelyi,” dadaa gaminne yaya' yuyagaa' yuyagaa' nemi munya ke'ba makilaana! Naanga nebulyasi.

Pikariyikwiaviya aaya yagaalya'nesi.

¹⁹ Niminyina Pirizilaviji Aakwilaamiji Woneziporaazare angeviyaraaviji duthana! “Poli yihithivani' ‘Nya'mweihi!’ ” ²⁰ Anga Koridi Erazitaazai kuna mwaali'. Nabaai Tiropimaazai nalaavinakei mwaalakevi anga Maalitaazi saba kuna mwaalya'neri wimwaaihena yagalya'mave. ²¹ Gimi yime'nya'bi' ya'gizi divadeiginyi. Yihuta kayaa'nanya pigaa'na nyemwaaidika! Yuvyulaazalyi Pyuthenizalyi Laainazalyi Kilothiyaasi neya'mwe yuya pwaraji giminyina “Neya'mweigi!” gyasiwaabaa'. ²² Naangei gimire kuryalyi gye'mwannemwaaalana! Gamire yanga gaimwange' sarimiji yihye'mwannarana!

Poli